



Harald Kvålen
Hyljeli
3895 EDLAND

Godkjenning av utsetjing av utanlandske treslag på 95/7 i Vinje kommune

Fylkesmannen viser til søknaden din frå 16.04.2013, og felles synfaring den 26.06.2013. Søknaden gjeld utplanting på inntil 125 daa fjellskogmark og tidlegare grøfta myr i høgdelag 860 – 890 moh sør for Førsvatn. Grunnen er svært steinrik, og det er tenkt spreidd planting der marka er eigna. Arealet er kartfesta, og det står 2 – 5 m høg glissen bjørkeskog der i dag. Det er tenkt å plante under skjerm. Søker har opplyst at det er planta ut eit betydeleg tal med vanleg gran og lutzgran, samt forsøk med kvitgran, engelsmannsgran, contorta og sibirsk lerk i dette området gjennom dei siste 20 åra. Søknaden gjeld spreidd utplanting av inntil 3000 planter av lutzgran (*Picea lutzii*) til skogformål. Fylkesmannen vil ikkje tilrå planting på myr eller andre våte områder av skoglege årsakar.

Søknaden er handsama med bakgrunn i Naturmangfaldlova av 2009-06-19 og forskrift om utsetjing av framande treslag til skogbruksformål av 2012-05-25.

Naturmangfaldlova er vurdert på fylgjande vis:

§ 8 Kunnskapsgrunnlaget. Tiltaket er stadfesta, og vurdert i høve til kjende opplysningar i Artskart, Naturbase, Miljøregistreringar i Skog (MiS) og Gardskart. Det er ikkje kjende miljøverdiar i eller nære utplantingsfeltet.

§ 9 Føre-var-prinsippet. Søknad gjeld forsøk med eit framand treslag i fjellskog, nære 900 moh. Det er lite sannsynleg at lutzgran vil kunne utvikle spiredyktig frø i dette høgdelaget, særleg av di lutzgran etter *Norsk svartliste 2012* har liten risiko for å spreie seg.

§ 10 Økosystem. Det er vurdert om planting av lutzgran i dette området fører til press på naturmangfaldet i dette området, og det er det ikkje grunnlag for å meine. På dei nærliggande areala er det allereie etablert vellukka plantingar med framande treslag, samtidig som desse areala er svært marginale produksjonsmessig på grunn av eit krevjande klima. Det vil og vere interessant å sjå korleis desse felta vil utvikle seg når skogen veks til, slik at ein har eit betre grunnlag for å avgjere kva for treslag som er best eigna for skogproduksjon i fjellskogen i framtida og verknaden dette har for miljøet.

§ 11 Kostnader ved forringing av miljøet. Teoretisk sett kan det koma spiredyktig frø i framtida frå desse plantene, men det er lite truleg at dette vil vere eit trugsmål for naturen i dette høgdelaget. Tiltakshavar må likevel fylgje med på om det vert etablert frøplanter frå denne plantinga.

§ 12 Driftsmetoder. Vanleg kunstgjødning kan nyttast så lenge plantene er små, men ein skal ikkje nytte kjemiske medel.

Forskrifta om utsetjing reiser krav til internkontroll. Fylkesmannen vil krevje at tiltakshavar fylgjer med på om desse trea avlar spiredyktig frø, og om det vert etablert frøplanter. Det kan krevjast ein rapportering på dette, og kostnader med ein slik rapport er søkjaren sitt ansvar.

Konklusjon:

Fylkesmannen godkjenner planting av inntil 3000 lutzgran på gnr 95 bnr 7 i Vinje, jf avmerking på innsend kart. Løyvet gjeld inntil 2016. Det er eit vilkår at søkjar fylgjer med på om det vert etablert frøplanter i området.

Om eigedomen vert seld må ny eigar gjerast kjent med dette vilkåret.

Vedtaket er gjort etter delegering frå Direktoratet for naturforvaltning. Ein kan klage på vedtaket , jf § 28 i forvaltingslova. Klagefristen er 3 veker.

Med helsing

Helge Nymoen
landbruksdirektør

Ole Jørgen Wefald
fylkesskogsjef

Brevet er godkjent elektronisk og har derfor inga underskrift

Kopi: Vinje kommune, næringskontoret, 3890 Vinje